

春

秋

傳

春秋傳卷四

滋陽牛運震學

閔公

元年春王正月

不書卽位繼弑君不卽位也

齊人救邢

書救善之也書人者以大夫帥師也

夏六月辛酉葬我君莊公

亂故是以緩

秋八月公及齊侯盟于落姑

落公穀作洛

盟納季子也季子賢而奔陳齊侯盟而復之書曰盟于落姑齊侯之志也左氏以爲請復季友是時閔公幼慶父專夫人爲內主則未知其孰請之也

季子來歸

其曰季子貴之也其言來歸喜之也貴之者賢之故不名異其文以嘉之也喜之者國內之人不言來國人思季子懼其去而不反也今得其還則其慰而幸之者至矣故曰季子來歸春秋如其意以書之也季子之出奔

不書爲賢者諱也書來歸則出奔可知也

冬齊仲孫來

此齊侯使之也何以不言使來則有事也何以不書事齊侯之使仲孫以爲省難又因以覘國則所事不可言也所事不可言則亦不得言使也仲孫者氏也何以不書名亦不書字書字則已褒書名則已貶仲孫之對齊侯曰慶父將自斃又曰君其務寧魯難而親之夫是以褒貶兼之也

二年春王正月齊人遷陽

脅而遷之也不地自是不復見也書人貶之

夏五月乙酉吉禘于莊公

吉禘禮也未三年而吉禘非禮也于莊公亦非禮也三年之喪實二十五月而畢於是大祭奉新死者之主于廟而遷廟之遠主於祧莊公薨至是適二十二月未應吉而吉也禘禮當行於大廟今禘於莊公則于新宮行之非所禘而禘也

秋八月辛丑公薨

不地弑也何以不書弑隱之也

九月夫人姜氏孫于邾

書孫邾而夫人之與聞乎故可知也文姜削氏哀姜存而不削者文姜孫於宗國不削氏不足以見其罪哀姜孫於邾非宗國雖不削姓氏而貶已見也

公子慶父出奔莒

繼公薨而書孫邾奔莒則夫人慶父之同惡弑君可知也不書討賊爲內諱也公子牙書卒而慶父不卒何也牙之罪猶可言卒也慶父之罪不可言卒也

冬齊高子來盟

其曰高子貴之也其曰來盟喜之也其不言使何也不以齊侯使高子權在高子也

十有二月狄入衛

滅而書入或曰不以夷狄滅中國也或曰不以累齊桓也然狄入衛而不有其地則實非滅也

此即狄之伐邢者去邢而入衛也

鄭棄其師

國未有棄其師者鄭人惡高克使帥師于河上久而弗召師潰焉是之謂棄其師云爾不書高克奔陳略之也

略克所以罪鄭此孔子之特筆也

春秋傳卷之四終

蘭陵門人張魯文校刊

春秋傳卷五

滋陽牛運震學

僖公

元年春王正月

繼弒不卽位正也

齊師宋師曹師次于聶北救邢曹師左作曹伯

此狄人再伐邢也書救善之也書次譏不速救也前救邢書人蓋齊之偏師足以卻狄矣此救邢書師則以齊合三國之衆而不能振邢於未潰也公羊子曰緩不及

事也

夏六月邢遷于夷儀

此諸侯遷邢也書之如邢自遷者邢如歸也公羊子曰邢之所欲遷也不書邢潰者略之也邢既遷矣則可以不言其潰也

齊師宋師曹師城邢

此三國之師也其再序之者何齊得救患分災之禮故重其事以誓之也不曰城夷儀而曰城邢者以存一國之義予齊桓也言夷儀則邢不見言邢則夷儀見

秋七月戊辰夫人姜氏薨于夷齊人以歸

公薨必地不地弑也夫人薨不地地有故也書齊人以歸著齊人之殺之也不稱齊侯稱齊人者討賊之辭也以歸歸于齊也

楚人伐鄭

鄭卽齊故也稱人外之也

春秋書楚自此始荆楚二木名南國以爲號詩奮伐荆楚是也熊氏本稱荆更號爲楚如商之稱殷也說經者曰州不若國書楚者進之非也來聘稱人略之也伐鄭

稱人外之也說經者以楚爲夷狄而謂春秋稱人者進之或以爲浸強稱人皆非也

八月公會齊侯宋公鄭伯曹伯邾人于榿

榿公作打

謀救鄭也

九月公敗邾師于偃

偃公作纓

邾同榿之會而公敗其師書之著魯之棄信而忘義也

冬十月壬午公子友帥師敗莒師于郕獲莒挐

郕公作犁穀作麗

莒貴賂也君大夫生得曰獲

十有二月丁巳夫人氏之喪至自齊

夫人書氏不稱姓絕於齊也齊姜姓也齊殺之齊已絕之矣於義夫人不得稱姜也何以書氏去氏則不稱姜之義不著也然則何不於其薨絕之夷之薨齊正夫人之罪不待絕而自見也

何休曰貶置氏者殺子差輕於殺夫夫哀姜與弑二君幾亡一國罪不殺於文姜矣矧殺夫去姜氏殺子去姜置氏義殊牽曲非通解也

二年春王正月城楚邱

楚邱衛邑也不言城衛與城邢異詞者邢遷而後城衛

城而後遷也此齊與諸侯城之也不言齊侯不書諸侯者略之也其文使若魯自城之者然城邢詞繁而不殺城楚邱則略之者何狄伐邢則救之邢遷則城之齊侯之於邢得救患分災之道矣書之重備予之也狄入衛而不救衛既滅而城之君子以齊侯爲怠於恤衛矣特其存亡繼絕之功不可沒爾書之略非備予之也

先儒以城楚邱不請於天子罪桓之專封夫救患分災興滅繼絕善之大者也城邢城楚邱春秋以齊桓猶知尊王章恤同盟矣書之有詳略予之有輕重爾非以城

楚邱爲罪其專封也且齊桓未嘗專封也衛周室封建之國狄滅之齊不容不復之與擅建一國者不同何專封之有而先儒猶以無封不告之義律之甚矣春秋之難言也

夏五月辛巳葬我小君哀姜

哀姜得罪於宗廟僖公以私禮葬可也以小君禮祔不可也

虞師晉師滅下陽

公穀作夏陽

下陽虢邑也書滅如一國者重下陽也先虞賄故罪虞

也號之滅不書下陽舉而號亡矣其滅不足更言爾

秋九月齊侯宋公江人黃人盟于貫

公作貫澤

江黃來盟善謀楚也蓋楚之右臂孤矣

冬十月不雨

此一時不雨也一時不雨則何爲獨書首月春秋一時不雨則書時踰時不雨則書首月此書冬十月不雨與莊三十一年異文者踰時不雨也

楚人侵鄭

三年春王正月不雨

夏四月不雨

每時而一書閔雨也爲六月雨書也

徐人取舒

舒楚與國也徐服於齊而取舒齊之謀也蓋爲齊通伐楚之徑也

六月雨

其言六月雨何喜雨也喜雨者有志乎民也春秋書雨此爲特筆以是著僖公之勤民也

秋齊侯宋公江人黃人會于陽穀

申伐楚之謀也

冬公子友如齊泣盟

穀作公子季友
泣公穀作巷

聽師期也公羊子曰泣盟者往盟乎彼也

楚人伐鄭

楚自莊十六年以來五加兵於鄭於此見齊桓之伐楚
蓋已緩矣

四年春王正月公會齊侯宋公陳侯衛侯鄭伯許男曹伯
侵蔡蔡潰遂伐楚次于陟

善伐楚也書爵褒之也遂者繼事之辭幸其伐楚而爲

之滿志又以爲志不在蔡也書次者有制之師用見起之不戰而詘楚也

夏許男新臣卒

新公羊作辛

不言卒于師實非卒于師也觀兩曹伯之書卒于師可比而知也

楚屈完來盟于師盟于召陵

何以不稱使權在完也猶齊高子來盟不稱使之義也其言來盟于師盟于召陵者何師在召陵也師在召陵則何以再言盟不書來盟于師則無以序桓帖楚之績

不書盟于召陵則無以著盟之地何以不言及諸侯盟
不使屈完得與諸侯伉也

齊人執陳轅濤塗

轅公穀作袁

稱人以執非伯討也

秋及江人黃人伐陳

及者公及也何以知爲公及此下文公至自伐楚在伐
陳之後則及者實公也然則何以沒公陳旣從齊與諸
侯伐楚矣齊執其大夫又令江黃伐之而使魯主之其
罪陳已備矣沒公爲內諱也

八月公至自伐楚

書而涉兩事擇其重者志之此以伐楚致大伐楚也

葬許穆公

穆公作繆

冬十有二月公孫茲帥師會齊人宋人衛人鄭人曹人侵

陳

茲公作慈

諸侯稱人貶之也陳成歸轅濤塗不書略之也

五年春晉侯殺其世子申生

曰晉侯斥殺稱世子罪晉侯也罪晉侯則申生無罪也

公羊曰殺世子母弟直稱君甚之也

杞伯姬來朝其子

來朝其子者以其子來朝也子不能朝而杞伯姬來爲主乎朝其子也然非禮矣

夏公孫茲如年

公孫茲易如年爲娶也娶則易爲不言娶不予其因聘而私娶也

公及齊侯宋公陳侯衛侯鄭伯許男曹伯會王世子于首

止首止公戰
作首戰

諸侯何以會王世子定世子也及以會者桓不主會也

會王世子者殊之也尊世子不使世子與諸侯齊列也
秋八月諸侯盟于首止

約諸侯以同戴世子也何以不與世子盟尊世子而不
敢與盟也諸侯何以不序公羊子曰一事而再見者前
目而後凡也

鄭伯逃歸不盟

書逃歸賤鄭伯也以爲國君而行匹夫之事也

楚人滅弦弦子奔黃

罪楚也

九月戊申朔日有食之

冬晉人執虞公

虞已滅矣曷爲不言滅執天子之三公其罪大於滅國
舉其重以罪之其滅則略之爾

六年春王正月

夏公會齊侯宋公陳侯衛侯曹伯伐鄭圍新城

伐鄭討其逃盟也圍新城鄭未服也穀梁子曰伐國不
言圍邑此其言圍何也病鄭也著鄭伯之罪也

秋楚人圍許諸侯遂救許

善救許也書遂美其救之速也

冬公至自伐鄭

其不以救許致何也伐鄭本事也

七年春齊人伐鄭

諸侯以救許而釋鄭未得志於鄭也故齊復伐之書人譏其瀆兵也

小邾子來朝

公作小邾
婁子後同

此邾黎來也初得王命而別封于邾故稱小邾以別之

鄭殺其大夫申侯

稱國以殺大夫殺無罪也或曰申侯非無罪也鄭之殺之不以其罪又藉以悅於齊其失刑甚矣故以爲殺無罪爾

秋七月公會齊侯宋公陳世子款鄭世子華盟于甯母作殺

寧母

謀鄭故也陳鄭先遣世子受盟欲與盟而未敢也

曹伯班卒

班公作殺

公子友如齊

勤伯國之好也

冬葬昭公

八年春王正月公會王人齊侯宋公衛侯許男曹伯陳世

子款盟于洮

陳世子款下公
羊有鄭世子華

謹王室也王人微者而序於諸侯之上尊王也王人法
得與諸侯盟非王世子比也

鄭伯乞盟

書乞賤之也以向之逃歸乞之也

夏狄伐晉

秋七月禘于大廟用致夫人

此因禘而致夫人也夫人者僖公夫人聲姜也凡夫人
初至自有告廟之禮因禘而兼舉之非禮也書曰用致
用也者不宜用也夫人至自齊不書略之也

按禘于太廟用致夫人三傳之說不同左傳曰秋禘而
致哀姜焉夫哀姜葬于僖二年既葬而蒞廟稱姑當久
已行之乃至今而始致主母乃已後乎且經文明明云
致夫人非致主之謂也穀梁傳曰言夫人而不以氏姓
非夫人也立姜之辭也說穀梁者以爲夫人僖公姜母
成風也嫁非稱見不得與齊諸公並尊其母故因秋禘

用夫人之禮致於太廟使之與祭也夫僖公旣立爲君
母以子貴成風固得爲夫人矣焉用禘于太廟而以夫
人之禮致之且禮君與君婦共事廟中未有君主祭而
使君母與祭者揆之體統舛逆殊甚僖公卽蹈非禮或
不至此矧穀梁氏本未嘗爲此說也公羊傳曰禘用致
夫人非禮也譏以妾爲妻也蓋脅于齊媵女之先至者
也說之者謂僖公本聘楚女爲嫡齊女爲媵乃齊先致
女而脅僖公以朝廟其說不知何據然以其事揆之則
齊桓必有所不爲而楚人亦必不肯受也細按經文當

是僖公逆聲姜于齊聲姜初至適遇禘于太廟因禘而
行告廟之禮故曰用致夫人此以失禮得書也其不稱
姜氏者義在禘以致夫人而不在姓氏又失禮在僖公
而不在聲姜又致夫人之下書姜氏則不成文故從省
也左氏勿論已公穀二家其說大略相似以爲致者初
至而舍薦於廟是矣第皆泥於不稱姜氏之說而謂魯
公告廟以姜爲妻事本無考解者岐山漫失其旨此經
義之所以不明也

冬十有二月丁未天子崩

左氏七年閏月王崩踰一年而後赴於諸侯說春秋者
蓋疑之經文自有可據爾

九年春王正月丁丑宋公御說卒

正月公穀作三
月御公穀作禦

夏公會宰周公齊侯宋子術侯鄭伯許男曹伯于葵邱

會于葵邱定王位也宋公稱子者在喪未葬也凡諸侯
在喪而出以喪行者稱子以吉行者稱爵

秋七月乙酉伯姬卒

內女許嫁書卒不稱國未嫁也稱字許嫁也

九月戊辰諸侯盟于葵邱

申王禁也桓公之盟葵邱爲盛重舉諸侯者前目後凡
且明宰周公之不與盟也

甲子晉侯詭諸卒

甲子公作甲
戊詭左作侂

甲子前戊辰五日則曷爲繫於後赴在後追書之也

冬晉里克殺其君之子奚齊

殺公
作弑

遇弑雖未踰年稱君此其稱君之子何不成其爲君也
不正獻公之殺適而立庶孽也

十年春王正月公如齊

公朝齊稱如者內辭也

狄滅溫溫子奔衛

溫天子實內之國而狄滅之王靈之不振伯圖之有闕也

里克弑其君卓及其大夫荀息

卓公作卓子

奚齊不書弑則卓曷爲稱君正里克之罪也不書其君之子則無以著獻公立庶之惡不正其爲君則無以討里克弑逆之罪於奚齊則書曰殺其君之子以爲特其君之子爾於卓則書曰弑其君以爲固儼然里克之君也里克弑君之罪著然後荀息死節之義明唯是可以

稱及其大夫不正其爲君則無以及其大夫也奚齊之與卓一也書之而兩著其義脩春秋之特筆也

夏齊侯許男伐北戎

書爵予之也

劉紹攷曰伐山戎在未伐楚之時舍元惡而勤遠略故貶而人之伐北戎在服楚以後故據其實而爵之

晉殺其大夫里克

稱國以殺罪累上也里克弑二君矣則曷爲不以討賊之辭言之惠公殺之不以其罪也

秋七月

冬大雨雪

公作雹

十有一年春晉殺其大夫丕鄭父

稱國以殺不與其殺也不鄭父不去其官原之也

夏公及夫人姜氏會齊侯于陽穀

此僖公夫人桓公女也兩君相見而婦人廁其閒非禮也參譏之

秋八月大雩

此旱祭也傳以爲過時非也

冬楚人伐黃

滅不言伐書伐病桓公也

十有二年春王三月庚午日有食之

夏楚人滅黃

不書君出奔死於其位也蓋自是而桓公之伯業衰矣

秋七月

冬十有二月丁丑陳侯杵臼卒

杵公作處

十有三年春秋侵衛

楚滅黃而齊不救狄所以橫行也

夏四月葬陳宣公

公會齊侯宋公陳侯衛侯鄭伯許男曹伯于鹹

爲王室平戎且謀城杞也

秋九月大雩

冬公子友如齊

十有四年春諸侯城緣陵

淮夷病杞齊桓合諸侯城緣陵而遷之不書城杞者城而後遷也此卽會鹹之諸侯也何以不再序踰年乃城力不能攘淮夷而遷杞桓之美桓之衰矣故書之略不

如楚邱而詳不如城邢

夏六月季姬及鄆子遇于防使鄆子來朝

鄆穀梁作給

季姬不繫之國未嫁也稱字許嫁也朝未有言使者言使非正也季姬許嫁于鄆遇鄆子而使來朝者使來請已也君子以夫婦之始爲不以道矣

按左氏鄆季姬來寧公怒止之以鄆子之不朝也遇于防使鄆子來朝則季姬乃已嫁而歸寧者也傳公穀者則以季姬爲未嫁之女遇鄆子于防使來請已以經文書法考之季姬不繫鄆明未嫁也書遇不期也書使來

朝變其辭深其文而使來請已之意可見焉後書季姬歸于鄆明季姬與鄆子先遇而後嫁也義更顯然若如左氏之說則季姬來寧公既止之何以得遇鄆子于防且鄆子既來朝矣卽當及鄆子偕歸何至遲至一年之後然後歸鄆卽歸鄆亦當書復歸不得徒言歸于鄆也反復考之義與經文不合故不敢據先儒謂季姬有淫佚之行僖公使自擇配此又錯解公羊之義失之愈遠矣

秋八月辛卯沙鹿崩

記異也此晉地而不繫之晉爲天下記異也

狄侵鄭

狄數犯畿內之諸侯書之著齊桓之怠也

冬蔡侯肸卒

十有五年春王正月公如齊

楚人伐徐

徐卽諸夏故也

三月公會齊侯宋公陳侯衛侯鄭伯許男曹伯盟于牡邱
遂次于匡

盟于平邱謀救徐也救而書次失救道也

公孫叔帥師及諸侯之大夫救徐

帥公作率

書救善之也君止不進而使大夫帥師以前則桓之志荒矣諸侯之大夫不序無功不足序也

夏五月日有食之

秋七月齊師曹師伐厲

伐厲以救徐也

八月螽

書災也

九月公至自會

季姬歸于鄆

己卯晦震夷伯之廟

記異也左氏以爲展氏有隱慝焉其說誣君子所不道
爾

冬宋人伐曹

宋始貳於齊伐曹脩舊怨也

楚人敗徐于婁林

救徐無功諸侯之不力也以是爲盟主病矣

十有一月壬戌晉侯及秦伯戰于韓獲晉侯

秦伯伐晉而經不書伐罪晉也書晉侯及秦伯以晉主是戰也何以不言師敗績君獲不言師敗績也其不曰以歸何言獲則以歸不足言也

十有六年春王正月戊申朔隕石于宋五是月六鵠退飛

過宋都

隕公作實鵠穀作鵠

記異也隕石隕星也星落地則爲石不言隕星者見石不見隕星也鵠退飛風也風逆驅則鵠倒飛不言風者言風不若言鵠之退飛也先隕後石者隕而後石也石

後數鵠先數變文也是月者鵠之退飛不可以日言故以是月槩之爾

三月壬申公子季友卒

大夫卒名則其兼書字何錄賢也或曰氏之也不言公弟者以莊公先死不得稱弟也

劉紹攽曰公子友以立僖之功生而賜氏俾世其卿春秋以此特書之仲遂叔肸書法竝同著三家之始也

夏四月丙申鄆季姬卒

秋七月甲子公孫茲卒

茲公作慈

冬十有二月公會齊侯宋公陳侯衛侯鄭伯許男邢侯曹伯于淮

爲鄆謀淮夷也邢始與會而在鄭許之下齊次之也

十有七年春齊人徐人伐英氏

齊爲徐報婁林也憾在楚而不能制以是爲遷戮爾人之者貶之也

夏滅項

孰滅之齊滅之何以不書齊蒙上伐英氏之文也然則何以書之如內辭滅項之役而我在焉猶之城楚邱也

何以知其非內滅之內滅國言取不言滅

按左氏淮之會公有諸侯之事未歸而取項說經者以爲內滅國書取此獨書滅者非公命也當是時季友已卒魯卿未有專政者滅項之舉誰尸之邪且取郕取邾皆魯近國魯未能興師踰遠而滅項也公穀以爲齊滅之者是也第謂爲桓譚滅國者其說曲矣

秋夫人姜氏會齊侯于卞

齊侯歸自會夫人會之于卞非禮也

九月公至自會

公出有故則致此何以致以公出踰三時也

冬十有二月乙亥齊侯小白卒

十有八年春王正月宋公曹伯衛人邾人伐齊

宋公下公羊有會字

邾公羊作邾婁

此納公子昭也曷爲不書納譏不在所納也桓公嘗屬公子昭於宋公以爲太子昭之立正也宋之納昭宜也則曷爲書伐不書納宋公志在伐齊不主於納昭故不與其納也

夏師救齊

書救者善之也書師救齊略之也不與其救齊也

夏五月戊寅宋師及齊師戰于鹹濟師敗績

戰而言及者主之者也猶曰宋師爲志乎此戰也齊人殺無虧曹衛邾之師皆散魯亦罷去宋則獨與齊戰而勝之是宋之亟於墮桓業而圖伯功也

狄救齊

齊人召之也書救齊非予之也

秋八月丁亥葬齊桓公

十一月而葬亂故也

冬邢人狄人伐衛

狄書人便文也書邢人狄人蓋不可曰邢人狄也以邢
儕狄責邢不當與狄比而伐國也

十有九年春王三月宋人執滕子嬰齊

執者亂辭也人之者貶之也執君不名此其名何遂失
國也名者諸侯之終事也閔之故名以詳之

夏六月宋公曹人邾人盟于曹南

公公羊作人邾
公羊作邾婁

曹邾稱人宋獨稱爵疑於齊桓之北杏然則春秋遂予
宋以伯乎曰非也予其圖伯爾其予其圖伯何曰楚勢

張矣宋以區區之國而與之抗是以予之也

鄆子會盟于邾

其言會盟何後會也不言如會者不及會所也然鄆子爲會盟來矣書之以著鄆子之無罪也

已酉邾人執鄆子用之

惡無道也用之者殺之而以爲牲也其不言宋人使之何鄆邾仇也執之者宋之志也用之者邾之志也邾子稱人貶也

秋宋人圍曹

討不服也其稱人何凡圍國雖君將貶而人之

衛人伐邢

報伐衛也書人貶之

冬會陳人蔡人楚人鄭人盟于齊

公羊作公會

此諸侯始與楚盟也陳蔡鄭稱人惡其與楚盟也沒公
諱與楚盟也齊不序爲桓公恥之也先陳倡是盟者也
後鄭鄭新朝楚因其下楚而下之曰是爲楚役者爾何
以盟謀宋也

梁亡

孰亡之秦亡之秦亡之則其言梁亡何梁自亡也

二十年春新作南門

譏更舊制也南門城南門也

夏郤子來朝

隱十年已取郤矣今來朝者蓋魯以其地別封之爲附

庸爾

五月乙巳西宮災

記災也西宮小寢也

鄭人入滑

貶而譬人者惡強陵弱也

秋齊人狄人盟于邢

爲邢謀衛難也狄書人便文也齊齊於狄亦所以狄齊也

冬楚人伐隨

二十有一年春秋侵衛

爲邢之盟也

宋人齊人楚人盟于鹿上

先宋宋爲盟主也此宋公也何以稱人盟楚以求諸侯

異於齊桓之攘楚者也

夏大旱

記災也言大者久且甚也

秋宋公楚子陳侯蔡侯鄭伯許男曹伯會于孟執宋公以

伐宋

孟公作霍
穀作雱

執宋公者楚子也何以不言楚子執之不與楚子之執
宋公且分惡於諸侯也楚子何以先諸侯不先書楚子
則無以見執宋公之爲楚子且無以見楚宋之爭長也
于齊桓上楚皆書人此其稱楚子何爲執宋公不可言

執宋人不可言宋人則諸侯皆稱爵楚亦不得不稱子也

冬公伐邾

邾公羊作邾婁

爲邾滅須句也

楚人使宜申來獻捷

不言宋捷者從上文可知也君使大夫何以特稱人不人之則是遂予楚也

十有二月癸丑公會諸侯盟于薄釋宋公

諸侯不序前目後凡也不言楚不與楚專釋也不書宋

公歸自楚而曰釋宋公病宋公之制於人亦以重楚惡也

二十有二年春伐邾取須句

句公作駒

須句魯附庸也邾滅之公伐而取之書之若邑然以其爲魯之私屬也不書反其君略之也

夏宋公衛侯許男滕子伐鄭

以鄭如楚故也

秋八月丁未及邾人戰于升陘

書及公戰也不言敗爲內諱也沒公亦爲內諱也內以

諱爲貶

冬十有一月己巳朔宋公及楚人戰于泓宋師敗績

戰而言及者主之者也楚子書人貶之也宋公傷股而
曰宋師敗績不斥言宋公爲中國諱也

二十有三年春齊侯伐宋圍緡

緡穀作
閔後司

書伐書圍罪齊也齊侯賴宋襄之力以得國乃乘其敗
而伐之所謂以怨報德也書爵者目其人以愧之也

夏五月庚寅宋公茲父卒

茲公
作慈

秋楚人伐陳

爲頓故也城頓而還

冬十有一月杞子卒

不名略之也

二十有四年春王正月

夏狄伐鄭

王爲衛請滑于鄭鄭執王使不臣甚矣王出狄師伐之
書曰狄伐鄭不及王討者不正王之用夷狄以伐中國
且爲王諱也

秋七月

冬天王出居于鄭

王者無出此其言出何內王都也曷爲言居不言奔晉
天之下莫非王土天子無客禮莫敢爲主焉故不言奔
而言居也諸侯去國則書奔天子去國則書居此有國
有天下之別也

陳氏傅良曰子頹之亂惠王未有過也王出居櫟不書
爲尊尊諱也叔帶之亂襄王則有罪矣其言出居于鄭
以爲無足諱焉爾

劉紹攷曰晉文勤王王入于王城取子帶殺之春秋削

而不書者以其請隧伐原用譎殊甚雖有功不足錄焉爾

晉侯夷吾卒

惠公以二十三年九月卒而書于此赴後也惠公及文公之入皆不書略之也

二十有五年春王正月衛侯燬滅邢

衛侯何以名滅同姓也他滅同姓者有之矣何以獨名衛侯不正其陰謀用間以取同自出之國是以於其甚者絕之也

夏四月癸酉衛侯燬卒

宋蕩伯姬來逆婦

婦人不專行宋蕩伯姬來逆婦非禮也不言逆女言逆婦者姑自來逆緣姑稱之也胡氏以爲譏公自主之則未知其誰主之也

宋殺其大夫

稱國以殺君臣共之也不名略之也

秋楚人圍陳納頓子于頓

書納不與納也頓子迫於陳而奔楚楚人納之何爲不

與納不與楚之納諸侯也不言遂一事也

葬衛文公

冬十有二月癸亥公會衛子莒慶盟于洮

盟于洮脩衛文公之好且及莒平也衛子者何在喪也

公與大夫盟不諱洮之盟無惡焉爾

二十有六年春王正月己未公會莒子衛甯速盟于向

速公

作邀

尋洮之盟也

齊人侵我西鄙公追齊師至鄆弗及

鄆公作崗穀作
弗左作不

侵曰人貶之也。追曰師爲追言救也。弗及者可以及而不敢及也。

夏齊人伐我北鄙

一歲再伐不義甚矣。故貶而人之。

衛人伐齊

洮之盟故也。

公子遂如楚乞師

書乞賤辭也不正其請夷狄之兵以苟自救也。

秋楚人滅麇以麇子歸

麇公羊作隗

楚滅同姓夔子失國不名略之也

冬楚人伐宋圍緡

緡穀作閔

宋卽晉也書伐書圍以著楚之橫也

公以楚師伐齊取穀

以者非所以也爲其用夷狄之師以伐中國惡之也

公至自伐齊

二十有七年春杞子來朝

夏六月庚寅齊侯昭卒

史記昭卒弟潘殺其子而自立春秋經傳不書然則史

記之說非也

秋八月乙未葬齊孝公

三月而葬速

乙巳公子遂帥師入杞

春來朝而秋用師以報之不義甚矣

冬楚人陳侯蔡侯鄭伯許男圍宋

楚何以先諸侯主兵也此楚子也則何爲獨人之正其
猾夏之罪也人楚子而諸侯從楚之罪見矣穀梁子曰
人楚子所以人諸侯也然則諸侯何以書爵不書爵則

無以見罪楚之甚也

十有二月甲戌公會諸侯盟于宋

此圍宋之諸侯也書會與盟不沒公不爲公諱從楚也然猶曰會諸侯不曰會楚使公從楚之罪必考而後見也以宋地者宋在圍而不與盟不嫌也

二十有八年春晉侯侵曹晉侯伐衛

晉侯書爵予之也侵曹伐衛則曷爲予之予晉侯之侵曹伐衛以救宋也然則曷爲不言救宋晉侯攘楚以存中國侵曹伐衛攘楚之事起於此救宋不足言也不聞

事而再舉齊侯何也言之不足而重言之所以大晉侯之功也

公子買戍衛不卒戍刺之

刺之者殺之也殺之則曷爲言刺之刑于隱也刺不言所坐此其言所坐何譏曷爲譏買無罪也公子買戍衛楚人救衛公懼晉畏楚殺買以說焉謂晉人曰以戍衛謂楚人曰不卒戍也

楚人救衛

書楚救衛以見晉之能致楚也

三月丙午晉侯入曹執曹伯畀宋人

凡執皆書人此其稱侯以執何伯討也其爲伯討奈何曹卽楚也執曹伯則曷爲畀宋人爲譎也

夏四月己巳晉侯齊師宋師秦師及楚人戰于城濮楚師敗績

戰而言及者以晉侯主乎是戰也齊宋秦言師晉獨稱爵者予之也楚稱人不以楚大夫敵晉侯也敗稱師以衆舉所以大晉侯之功也

孫氏復曰齊桓書人伐楚後始書爵晉文一舉卽爵者

與其功不旋踵而建也

楚殺其大夫得臣

此殺有罪也而以累上之辭言之者惡楚子也

衛侯出奔楚

不名未失國也或曰以罪晉也

五月癸丑公會晉侯齊侯宋公蔡侯鄭伯衛子莒子盟于

踐土

序晉侯於諸侯之上予晉以伯也衛叔武稱子不成君也王下勞晉侯不書爲王諱也王子虎蒞盟不書不與

欽也不書王錫晉侯命略之也

汪克寬曰踐土于溫諸侯皆先朝而後會春秋皆先書會後書朝者著晉文之合諸侯以尊王也

陳侯如會

其言如會何外乎會不及序也

公朝于王所

天子所在曰王所朝于王所禮之變也以爲晉文能使諸侯尊王也其但言公何非期會不序言公則諸侯可知也

按王所者謂王在踐土也前書盟于踐土後書朝于王所則王之在踐土明矣左傳無召王之事蓋王自來勞晉侯爾公羊以爲不與致天子非也

六月衛侯鄭自楚復歸于衛

復歸者順辭也以爲國猶其國也衛侯出奔不名則復歸何以名別二君也其言自楚何惡自楚也

衛元咺出奔晉

愬殺叔武也殺叔武曷爲不書以爲衛侯猶未處心成於殺爾

陳侯款卒

秋杞伯姬來

來謝過而求平也

公子遂如齊

冬公會晉侯齊侯宋公蔡侯鄭伯陳子莒子邾子秦人于

溫

穀無齊侯

謀討衛許也

天王狩于河陽

狩穀作守

古者天子有巡狩之禮此非狩也則其曰狩何春秋之

特筆也晉侯召王以諸侯見書之使若王自狩然爲晉侯諱也易爲爲晉侯諱諸侯不朝久矣以爲晉侯雖謫猶能尊王也此溫也而以河陽言之爲天子之狩大之也

壬申公朝于王所

晉人執衛侯歸之于京師

歸之于者強辭也用元咺之愬也不正晉侯之崇其臣而執其君故貶而人之

衛元咺自晉復歸于衛

歸諸侯而後言復大夫言復者罪之也自晉者譏在晉也

諸侯遂圍許

遂繼事也此目會溫之諸侯也

曹伯襄復歸于曹遂會諸侯圍許

失國非二君不名此其名之何罪之也

二十有九年春介葛盧來

不書朝者何夷無朝禮言來而已

公至自圍許

以圖許致著公之久在外也

夏六月會王人晉人宋人齊人陳人蔡人秦人盟于翟泉

會上公穀有公

字翟公作狄

尋踐土之盟且謀伐鄭也此晉初以大夫盟王人也大夫稱人而不序諱以大夫盟王人也沒公爲公諱也不斥言王子虎爲尊尊諱也以大夫盟王人則諸侯敵王蓋自是而晉文之志荒矣

秋大雨雹

何以書爲災也

冬介葛盧來

三十年春王正月

夏狄侵齊

書之以著晉文霸業之衰也

秋衛殺其大夫元咺及公子瑕

稱國以殺者君與大夫殺之也衛侯在外其稱國以殺何也穀梁子曰待其殺而後入也瑕見立於元咺曷爲以咺及瑕咺累瑕也稱公子不成君也

衛侯鄭歸于衛

書歸不書復不與衛侯以復也初歸書復國猶其國也
再歸不書復國非其國也名之者亦失國之辭也

晉人秦人圍鄭

翟泉之盟鄭不至故也一不預盟而虐之以兵非服貳
之道也故貶而人之先晉晉爲志乎圍鄭也

介人侵蕭

冬天王使宰周公來聘

公子遂如京師遂如晉

如京師報周公之聘也遂繼事也見公子遂之不專於

如京師也

三十有一年春取濟西田

凡力得之曰取此濟西田也惡乎取之取之曹也曷爲不繫之曹吾故田也

按濟西魯之西境是時曹不得志於晉魯乘曹之危而以兵復其故田故書曰取左傳以爲晉分曹地而魯受之晉非也

公子遂如晉

夏四月卜郊不從乃免牲猶三望

魯曷爲郊啓蟄而郊爲農事也古者天子有冬至之郊有啓蟄之郊一以報本一以祈穀魯不得有冬至大郊之事而於啓蟄祈穀殺於天子也然則何以四月中氣在四月也郊曷爲卜祭則卜日也比旬而卜遠慢也三卜不從則不郊矣四卜非禮也曷爲或言免牛或言免牲未卜曰牛旣滌曰牲猶者何通可以已也三望者望祭也然則曷祭祭泰山淮海天子祭四望魯祭三望者亦殺於天子也何以書譏不郊而望祭也

按郊祭有二一是冬至報本之祭天子用之郊特牲所

云迎長日之至大報本反始也一是正月啓蟄祈穀之祭天子諸侯皆用之孟獻子所云郊祀后稷以祈農事左傳啓蟄而郊是也春秋所載郊祭皆祈穀之祭本非僭禮歷考卜郊之月皆在四月蓋啓蟄中氣多在卯月祈穀之祭則自啓蟄以後春分以前皆得卜之所謂不過乎分是也其在孟春之月祇卜牲耳帝卜必在滌三月故正月可以卜牲非干天子冬至報本之祭也

按家語孔子對定公曰郊之祭也迎長日之至也大報天而主日至於啓蟄之月則又祈穀于上帝此二者天

子之禮也魯無冬至大郊之事降殺于天子若此則魯郊之非僭明矣春秋書郊者九皆以郊之有故而書著其變而失禮非著其僭也

秋七月

冬杞伯姬來求婦

求婦非正也姑無自求婦者也

狄圍衛

十有二月衛遷于帝邱

于穀作於

避狄也於此見晉文之德衰矣

三十有二年春王正月

夏四月己丑鄭伯捷卒

捷公作接

衛人侵狄

報狄之圍也稱人者大夫帥師

秋衛人及狄盟

不地盟于狄也

冬十有二月己卯晉侯重耳卒

三十有三年春王二月秦人入滑

滅而書入不能有其地也

齊侯使國歸父來聘

夏四月辛巳晉人及姜戎敗秦師于殺

公羊無師字

此晉子也其稱人何爲晉諱也何諱乎爾爲其能敗秦
善之故爲其釋殯而戰諱之也稱人使若晉子不在行
然

癸巳葬晉文公

狄侵齊

公伐邾取訾婁

訾婁公羊作婁婁穀梁作訾樓

報升陞之役也

秋公子遂帥師伐邾

傳公羊作率

閒晉之有事而連伐邾備書之所以貶也

晉人敗狄于箕

稱人猶殺義也

冬十月公如齊

省狄難也

十有二月公至自齊

此何爲至公反自齊而薨嫌以齊故也

乙巳公薨于小寢

小寢非正也

隕霜不殺草李梅實

隕公作實

記異也草舉輕則重者可知也

晉人陳人鄭人伐許

討其貳於楚也

春秋傳卷之五終

蘭陵門人張魯文校刊